


INFORMA BULTENO DE BRAZILA ESPERANTO-LIGO
Boletim Informativo da Liga Brasileira de Esperanto
Praça da República 54-2º andar - 20.211 - Rio de Janeiro-RJ
BRASIL



IMPRESSO

ENKONDUKAJ VORTOJ

Ne timu, karaj legantoj. Ĉi tiu informilo ne anstataŭos la jam delonge atenditan revuon BRAZILA ESPERANTISTO, oficiala organo de nia Asocio. Kiel bona novaĵo, ni povas garantii, ke tiu gravega organo reaperos en la fino de la kuranta kvaronjaro (MARTO).

BEL INFORMAS konsistas nur el pli ofta kaj malplikosta informilo, kiun ni klopodos sendi al vi ĉiumonate.

Ŝajnas al ni, ke neniu dubos pri ĝia taŭgeco. Pere de ĉi-tiu dupaĝa bulteno ni certe povos transdoni al vi, ĝustatempe, la plej urgajn informojn, kiujn vi bezonas por aktive partopreni en nia movado kaj por plibone kompreni niajn malfacilaĵojn kaj niajn sincerajn klopodojn.

Al ĉiuj niaj amikoj kaj legantoj ni deziras feliĉan novjaron, sanon, pacon kaj renovigitan entuziasmon!

ANTICIPE NI PARDONPETAS AL ĈIUI, KIUJ SENDIS AL NI RAPORTOJN PRI SIAJ AGADOJ, ĈAR PRO MANKO DE SPACO NI ESTAS DEVIGATAJ DRASTE MALLONGIGI LA INFORMOJN.

PROBLEMO DE PERADO

Ni memorigas vin, ke sendado de mono eksterlanden ne estas simpla afero. Se oni ne serioze kalkulas la elspezojn devenantajn el tiu treege utila laboro, nome perado de aliĝoj al UEA kaj abonoj de revuoj aŭ gazetoj, oni facile bankrotos. Tial ni estas devigataj postuli kromajn kruzejrojn, kiel sendkoston tarifon, de tiuj, kiuj intencas utiligi nian perantan servon.

Por ke vi konstatu, ke ni ne trograndigas la aferon, ni sugestas, ke vi mem iru al iu ajn banka agentejo kaj demandu kiom da mono vi devas elspezi por transpagi la prezojn aperantajn en la anoncetoj de eksterlandaj publikaĵoj. Ni ankaŭ profitas la okazon por memori vin, ke la kotiztabelo disvastigita de UEA en la revuo ESPERANTO(okt/82), ekde la komenco de la kuranta jaro, ne plu validas. Al la novaj prezoj anoncotaĵoj de UEA, bonvolu aldoni 25%, se vi deziras, ke ni sendu al Rotterdama la guldenojn respondajn al la kruzejroj, kiujn ili postulas de vi.

FUNKCIADO DE BEL DUM JANUARO 83

Dum la kuranta monato, pro libertempo de nia nura oficistino, la sidejo de BEL restos malfermita nur sabate, de la 15^a ĝis la 18^a h.

Por urgaj kontaktoj bonvolu sin direkti al unu el ĉi tiuj estraranoj:
MARINHO (Tel:284-6410) - SARTORATO (Tel: 275-4181)

Estas malfacile plenumi niajn rutinajn taskojn, eĉ kalkulante je la laboro de tiu senlaca oficistino. Imagu kiel estiĝas la situacio sen la ĉeesto de nia karega MÔNICA! PREFERINDE, DUM JANUARO SENDU AL NI NUR NEPRAJN KAJ URGAJN LETEROJN. DANKON!

ZAMENHOFAJ FESTOJ EN RIO DE JANEIRO

La 11an de decembro, BEL okazigis programon speciale destinitan al la ne-esperantista publiko por prezenti al ĝi interesajn aspektojn pri la vivo kaj verko de Zamenhof. Partoprenis kiel prelegantoj, en tiu instrua vespero la jenaj samideanoj: S-ro Antônio Rodrigues (resuma biografio de Z.), D-ro Floriano Pessoa (Z. kiel tradukisto kaj verkisto), Prof Jair Salles (lingvistikaj aspektoj de Zamenhofa verkaro), Prof Sylla Chaves (Z. kiel poeto), S-ro Amarílio Carvalho (La interna ideo) kaj Kol. Jorge Campos (Z. kaj lia proverbaro). Sekve, F-ino Izabel O. Santiago, kiu partoprenis en la ĵurio ĉe la 15^a Pupteatra Internacia Festivalo, aranĝita de Internacia Kultura Servo en Zagreb, regalis nin per amuza muzika pupteatra prezentado citolita VERDA ĈAPO.

Lera sukceso estis la kunfratiĝa tagmanĝo programita de Kultura Kooperativo de Esperantistoj, okazinta la 18an de la pasinta monato, memore al la latreveno de Zamenhof, en la restoracio EXPRESSO, proksime de KKE.

Kun granda plezuro la Prezidanto de BEL, akompanata de aliaj membroj de nia asocio partoprenis la inaŭguran solenaĵon de ESPERANTO-GRUPO ISMAEL GOMES BRAGA (Rua Silva Cardoso, 673 - BANGU - RIO DE JANEIRO, RJ). Ni sincere gratulas la organizintojn de la belega kaj emociiga programo pro la ne-forgesebla festo. Fruktodonan oficperiodon al la ĵus enpostenigitaj estranoj!

SPIRITISMA FEDERACIO DE ĜTATO BAHIA - ESPERANTA STUDGRUPO "ZAMENHOF"

Je la 19^a kurantmonate, en solena kaj memorinda ceremonio, S-ro Prez. de Spiritisma Federacio de Ĝtato Bahia, D-ro Ildefonso do Espirito Santo, enpostenigis la unuan estraron de Esperanta Studgrupo "ZAMENHOF" (Praça Anchieta n^o 8 - Terreiro - 40.000. Salvador - BA). Ĉi-sekve ni kopias la finajn vortojn de la cirkulero, kiun ni ricevis de Prof-ino YVETTE MENEZES QUEIROZ, direktorino de tiu institucio: "Fine, se vi povos kaj deziros, mi sugestas ke vi sendu gratulojn al inda Prez. de nia Federacio, por ke ili pli kaj pli, restu entuziasmigita pri nia tutlanda kaj tutmonda esperanta laboro".

Oni devas rimarki, ke D-ro Ildefonso iam lernis Esperanton iomete. Ni dankas la informojn kaj deziras sukceson al ĉiuj studgrupanoj.

INTERVJUO PRI ESPERANTO EN RADIO KOPAKABANA-RJ

La 17an de ĉi tiu monato, ekde la 21^a kaj duono, Radio Kopakabana prezentos 30 minutan intervjuon, kiu estis sonbendigita okaze de la vizito de Prezidanto de BEL al tiu radistacio. Radio Kopakabana funkcias je la Rua dos Inválidos 182, Rio de Janeiro - RJ kaj elsendas je 680 kc (mezaj ondoj) kaj 5.015 kc (mallongaj ondoj). Reagoj al la programo estos ĉiam bonvenaj.

5^a BRAZILA ESPERANTISTA JUNULARA KONGRESO - IPORÁ, GO - 26/30 JANUARO 83 KONGRESTEMO: ESPERANTO: INSTRUADO KAJ INSTRUISTOJ - METODOJ KAJ PRAKTIKO CIAL PARTOPRENI:

- 1) Ĉar la tiea esperanto - grupo meritas nian apogon;
 - 2) Ĉar BEJO meritas vian apogon;
 - 3) Ĉar la Junulara Kongreso estas tre serioza evento;
 - 4) Ĉar sen vi, ne ekzistas Esperanto-Movado, pro tio ke la movado estas vi mem!
- (EL BEJO - informilo)

SUKCESA KONGRESO DE LA KONSILANTARO

Inter la 3^a kaj la 5^a de decembro, pasintjare, okazis, en Brasilia-DF, la III KONGRESO DE LA BRAZILA KONSILANTARO DE ESPERANTO. Ĉirkaŭ cent personoj atente sekvis la diskutojn pri la ĉeftemo de la Kongreso:

ENTJARIĜO DE ESPERANTO.

La Prezidanto de BEL estis ĝentile invitita partopreni en la Honora Komitato.

BONVENAJ VIZITANTOJ

Kun la lastaj semajnoj BEL ricevis plurajn gravajn vizitantojn. Krom la Prezidantoj de BKE kaj KKE, kiuj ĉeestis nian lastkunsidan asembleon, por ĉirkaŭbraki la ĵus enpostenigita estraro de BEL, ni havis grandan plezuron interŝanĝi spertojn kun la sindona Prezidanto de Bahia Esperanto - Asocio, D-ro Isao Noguti, okaze de lia neatendita alveno al RJ. Aliaj tre interesaj kaj agrablaj kontaktoj estis tiuj, kun Alberto Milhomens, el Belém-PA, Paulo Sérgio Viana el Lorena-SP kaj Nelson Pereira de Souza, vicprezidanto de BKE.